



## 黃美貞 女士

客家語 / 散文類 / 教師組

得獎作品 /

遶山

### 【得獎感言】

用客語來寫生活，生活緊來緊生趣

頭下碼愛感謝評審先生个肯定，做得得獎乜愛感謝屋下人个支持，特別係吾老公，雖然佢毋係客家人，毋過佢當鼓勵俚用客語來寫作。

這篇遶山，係同老公共下去遶山个生趣事，佢煞猛安排行程，俚就煞猛來共下行，無想著做得變成一篇散文，賺著健康又得獎，實在還歡喜。

## 遶山

自從俵仔去外地讀書，屋下淨伸偈兩公婆定定，逐禮拜六盡重要个頭路就係去蹶山，毋多知仔，就蹶了兩十零座山仔，在手機仔个APP紀錄，看得著去過个所在，相簿乜有異多在三角點擊鐵牌仔个相片，細細个成就感漸漸仔在心肝肚暴芽。

親山步道就係分大家接近山林，輕鬆散步个路線，比起古道，簡單加異多，故所，逢著寮日，大家相湊去遶山花，照等手機个路線來達到自家个目標，就變成一個潮流。後生个爺哀帶細孺仔共下行，言會行路个就用背帶背在面前，細人仔做得用目珠來看迂迂轉个風景，係睡忒哩，就用背帶背在背囊項，細人仔个心肝前貼等爺哀个背囊，輒常睡到凝覺，有罇得人惜；有兜仔正學行，就用牽个，緊行緊講，緊行緊教，路脣个花草，變成自然个教材，比將講：「蝦公腳會黏人哦！你行到哪位，佢就會跣等去哦！」「彎彎虬虬个蕨，係好食个野菜！」有兜个罕得看著，打幫科技个發達，用手機仔一照，黏時花草名仔就出來哩！

有兜个細人仔毋慣行山路，行到瘰哩！就坐在地泥打頓屈，按蹄蹬爪起魯夫，這時就愛看爺哀仰般來教招，講佢盡喜歡个故事，無就共下唱一條歌仔，輒常細人仔歡喜了，走到爺哀跣佢毋著，毋多知仔就行到終點哩！有一擺，佢就問一個後生个阿姆：「你從細就喜歡蹶山係無？」佢講：「做阿姆正開始，愛同細人仔共下培養感情，共下達到目標，每擺个腳跡同步數，全部會記錄在APP，不時還會有獎牌鼓勵，雖然轉到屋下个時節，腰掛背吊，人強強會動忒哩！毋過同細人仔共下分享過關个歡喜，就毋知瘰哩！」

後來，偈兜又湊好朋友一家人去遶山花，佢係一個單親家庭，一儕人渡兩隻細人仔，大个係俵仔，細个係妹仔，兼兼仔四十歲正做阿爸，頭那毛又白白，輒常有人佬著係阿公渡孫仔，頭下碼異多人會問，佢也照實講，後來也懶哩，就由在人講哩！該日，佢背等一隻皮包仔，正手牽等妹仔，左手帶等俵仔，吾心肝肚想，又毋係上班，皮包仔好做麼个？徑杈都有。言知，正行到半崎仔定定，佢就從皮包仔肚項拿出兩罐涼水，還用面帕同細人仔搽汗，脫減一領衫；續下來，又變出一盒切便个黃梨，合勻勻平大埕，吩咐細孺仔兜來問佢，愛嘗看啊無？看佢三子爺食到舐嘴舐鼻，就試著該隻袋仔無簡單，肚項應該還有當多寶貝。

路脣堵好有一頭桑仔樹，桑仔子打到結結，有紅个有烏个，佢無想著自家个年紀，

定定仔蹶到圖牆項，摘幾下粒果子放到手巴掌項，先分細人仔看看仔，再嘗看啊係麼个味緒，結果細狷仔牙研目皺，脣項个人都噓壞哩！脈脈風有一個想法，該係朱自清大師个「背影」，不管係麼个時代个阿爸，講著係為著子女，正經會毋記得自家个年紀同體力，總知愛拚分細人仔，就算摘等柑仔爬上月臺也甘願，惹阿爸係無分時代个。

人講「公婆鬥搭，銅鑼打塌」，交往十年加結公婆十九年，講實在話，愛好好相處正經無恁該免哦！旨結婚个時節當單純，兩儕人个世界甜到像蜂糖，看毋著對方个缺點，多少仔打毋堵好，笑笑仔就好，全無看毋過目个時節，連遲到半點鐘久，就毋識嫌半句話；結公婆又係另外一個階段，愛愁食愁著，愁子女愁錢銀，項項就愛愁便來。生活个微毛末節，變成公婆个考驗，雖然多多少少會雜嘴，日仔還算平順。後生時節為著生活打拚，罕得兩公婆共下去遠寮，行到中年做得去遠山花，算來係甘蔗倒反食，緊食緊甜。

頭下碼，因爭新冠肺炎个關係，愛減少群聚个活動，跔到無結煞，高不將先去海脣个步道吹海風，該位算來係熟絡个所在，讀大學該下就識去寮，後生人騎奧多拜去寮盡暢快，先去拍電影出名个九份，平常時在學校看往上，九份个夜景係歸大片金色个光景，迂迂轉个山仔圍等佢，仰仔看就係試著靚，心肝肚惱等山頂仰會有恁靚个所在，原來細細个山城，頭擺有金礦好挖，故所有電影院、街市，後來又拍電影紅到外國，連外國人就認定个景色，一直到今，大家就說到擎手指公。

九份脣項有一座山仔安到雞籠山，山形看起來像雞弁，在九份看雞籠山當真、看現現，一路蹶梯排上，半山排有三座涼亭，做得坐寮歇暈，行到山頂看啊下，又換九份在腳下，偃盡記得該央時，上梯排毋多知仔，緊打嘴鼓緊行，無幾久就到山頂高，下崎就難耐了，緊行腳就緊顫，一步一步愛當認真，驚怕打腳偏，係無細義陪著就壞蹄哩！

隔了三十年，同共樣个伴來體驗，這擺，偃兩儕先愁便哩！毋知有才調無？上崎簡單下崎難，兩儕講好愛定定仔行，一路个娘花跔等風搖來擺去，像海浪樣仔，心情加異輕鬆，對山頂看下去个陰陽海，一截泥色个海，一截青色个海，因爭金瓜石礦山个水流到海肚，肚項有鐵个成份，浮在海水面項，三公尺以上个海係泥色，三公尺以下个海係青色，係特殊个風景。

山仔無變，海也無變，連人就共樣這對，兩儕一開頭就笑哩！無想著三十年後，還有這個緣份，毋單淨結公婆，還湊等來共下寮。這擺，上崎毋敢行遽，行有一段路就先頓

恬，食兩口茶，撥一下涼，啟一下大氣，繼續行上去，到山頂還毋敢相信；本旦恍著下崎怕會腳軟，無想著，下山乜異輕鬆，算來係佢變較康健，還係後生時節該下，忒少運動哩！盡重要个係兩公婆平安下山就好！

係講蹶大山仔尋毋著路，斯有可能，蹶矮山仔係撞走，斯會變成大家講笑科个對象。在山肚行路，總會看著細細个布條縲在樹杷項，歸路仔个布條，成時試著係垃圾。毋過該擺溪州山个經驗，命就嚇冷了，好在該兜布條正尋得著路好轉。

石門水庫脣項个山排仔，算來係輕可个路線，這擺有朋友來鬥陣，三儕共下行，毋過佢較罕得運動，故所行較慢，堵著較瘖个崎，又停跔一下，歸路仔就緊會失禮，試著異敗勢，就建議下山行無共樣个路線，時間較短，毋過愛揪等索仔蹶等下。頭下碼，佢兜試著異生趣，一路蹶等下，堵著山溝就跳過去，跳上跌落，恍著自家係二十零歲个大學生，心肝肚想，用溜个省使行，賣懶个心態顛倒壞，愛遽顛倒慢。

路仰緊行緊細，毋像路，像山壩，還有水流流流流，毋知對哪時開始，無看著該兜花啦必駁个布條，遽遽拿出手機仔，一對啊去，壞蹄哩！這毋係路，路哪去咧？愛仰結煞？跔水行可能較安全？行往下應該就有路，脣項還有弓蕉園，看起來有人整理，應該尋有路正著？行入弓蕉園看啊，左片析無路，右片析乜無路，手機仔無法度確定方向，乜無帶指南針，該就用頭擺學个救難常識，行往上有光線，乜看較闊；三儕人行兼來，做毋得分散，想著還細个時節，伙房个叔公講：「山肚有芒神仔，蛇仔準雞腩，牛屎準糯飯」，佢兜恬恬毋敢亂講話，行往上就到哩！盲知，竹頭下仰有兩隻窿，阿姆哀正得！腳步放輕來，莫嚇著窿肚項个動物，好在，頭前个竹杈項就有兩條布條仔，心肝加異定貼。

尋著路哩！大家歸路仔毋敢濫糝講話，也好得打早出門，還有日頭个光線，盲知，最落尾个路嘎弛下來哩！雖然有索仔好揪，毋過泥落忒當多，連樹根就看現現，倒轉去又還當遠，實在無力哩！僅可定定仔翻過去，險險就會跌下去崩崗下，嚇到伸半條命哩！。後尾這段路實在瘖，越勢愛細義，好得命大，大家平平安安過詐。轉到屋下，跔等洗身腳，換忒一身泥棍棍个衫褲，正去城隍爺拜喺過運。

遠山時時就有考驗，成時一無注意，共樣个路重複緊行乜有，撞走尋毋著路乜有；好在大部分个山路通通透透，逐條路就做得行到山頂，坐下來看一下風景，下一步个想法可能又無共樣了！遠一轉山，心情放開來，下山又係另外一個新个開始。